

## Damain entradas per ils purs

■ **(anr/ld) Sut il motto: «Prender dapli e pajar damain – quai na va betg si» ha l'Uniun purila svizra fatg attent las medias a Berna a la situaziun actuala dal puresser.** Tenor ina comunicaziun da l'Uffizi federal d'agricultura èn sa reducidas las entradas dals purs l'onn 2015 per 10,9 pertschient. Concret munta quai ina reducziun da las entradas da la famiglia purila da 63 133 l'onn 2014 sin 61 400 u 44 600 francs per persuna. En il territori muntagnard cuntanscha il puresser mo la mesada da las numnadas entradas. Las pli marcantas reducziuns dals pretschs han ils experts registrà tar il pretsch per il latg (53 raps il liter) e tar la charn-portg. La producziun agrara totala è sa sbassada per 5% (-592 miu.) sin 10,1 milliardas francs. Per *Markus Ritter*, il president da l'uniun purila, sa

chatta l'agricultura davant grondas sfidas. Il ferm franc svizzer e las fieras liberalisadas muntan in squitsch enorm sin ils products agrars. Vitiers vegn il fatg che noss pajais vischins pon producir lur products pli bunmartgà che la Svizra. Il puresser svizzer ditgia dentant gea a quellas sfidas. Las famiglias purilas èn oz pli innovativas che zacur e tschertgan nischas per augmentar la creaziun da valur. Ellas produceschan specialitads che chattan ina buna vendita. E tutina, constatescha Ritter, na possia betg cuntinuar quest svilup. Bleras famiglias vivan da la substanza, quai che munta ina nau-scha perspectiva per las famiglias giuvnas. Per quest motiv s'engascha l'uniun purila vinavant per gistas cundiziuns da producziun e per ina adequata remuneraziun da la lavur purila.